

DAWA MIZIZI MIREFU

Maradhi yameenea, Kaskazini yajia
Wanyama wayachukua, ndio watutawanya
Fisi mbweha nasikia, ni wenye kutuletea
Maradhi si malaria, yamezidi hata wehu.

Hayajawahi tokea, waganga hawajajua
Wamechunguza kwa nia, waganga nawasifia
Ila hawakugundua, ugonjwa unavyokua
Hili gonjwa la ajabu, mtaalam ni nani?

Watatu walijifia, waganga kuangalia
Dalili kujionea, vidudu vikitembea
Mganga vikamwingia, kesho yake kajifia
Daktari Kariuki, Mungu amweke pema.

Hofu ikatuingia, ugonjwa umenuia
Sisi sote kutuua, taifa ladidimia
Wengine walikimbia, ati kujiondokea
Ugonjwa waleta baa, nchi ipo mashakani.

Waganga kuendelea, mabuku kujisomea
Machweo ulitokea, lakini kwa kukisia
Ukiitwa Kefilia, ni ugonjwa wa hisia
Mawazo yakawazonga, huku umeingiaje?

Mabuku kuyapekua, wanyama kuwapasua
Uchunguzi kutimia, waganga kupambanua
Wadudu wenye mikia, ndio wanaotuaa
Wadudu baakokai, ndilo jina walopata.

Tiba wakafikiria, waganga walosomea
Tabu ikawaingia, jinsi ya kuwaua
Sumu walizotumia, wadudu wavumilia
Dawa gani watumie, watu wasishambuliwe?

Waganga wakapania, wadudu kuwatimua
Misitu wakaingia, madawa kuyachimbua
Mizizi waliing'oa, ila haikuwajia
Akili zikawakuna, kama upele wa ngozi.

Siku zikajiendea, na watu wakaugua
Wengine walijifia, bahati ikatokea
Dawa ikasaidia, ikatuliza hisia
Dawa hiyo kitulizo, si dawa ya kuponyesha.

Waganga huendelea, nia haijakimbia
Lakini hii hisia, wazee yawasumbua
Dawa haijakolea, vidudu vyawazoea
Baakokai wagumu, dawa mizizi mirefu.